

**GONGA  
RAK SANPA  
GONGSA  
TE REPA**

*Julius L. R. Marak, Ph.D.*  
*1991.*

4/1/21  
Acc. No. 8741  
Class No.        Book No. 1181  
Author Mavak Julius L.R.  
Title Gonga Raksaupa  
Gomasa Tereks

**DISTRICT LIBRARY**  
**EAST GARO HILLS DISTRICT**  
**WILLIAM NAGAR**

---

*Accession No.*       

1. Books may be retained for a period not exceeding *fifteen days* by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it will constitute an injury to a book.
4. *Any such injury to a book is a serious offence; Unless the borrower points out the injury at the time of borrowing the book he shall be required to replace the book or pay its price.*

**Help to keep the book fresh and clean**

# **GONGA RAKSANPA GONGSA TE·REPA.**


**Julius L. R. Marak, Ph. D.**

**Chapa ka.chenggipa**  
**October, 1991.**

**King Hajalsa**

**(C) Dr. Julius L. R. Marak, Ph.D.**

**Dam — Gong Chiking.**



# KATTA BICHONGRANG

<u>KATTA BICHONG</u>	<u>JAK</u>
Janapani .....	i — ii
A'song Chiga .....	1
Gongani Brangbaa .....	1 — 7
A'ning dedrang ja'kurik	
Ja'ku sanbaa .....	8 — 11.
Gonga Raksanpa A'gilsak .....	
Chigilboona re'bapila .....	11 — 21.
Gonga Gongsa Kilbolma supea .....	21 — 29.



## Janapani

Gonga Raksanpa Gonga Terepani kam aro kattarangni gimin Atchu Ambini aro Ma'gitcham Pagitchamrangni ku'ringrangoniko an'ching pangnan knaronga. Indiba, Gongara mitdeanma, mandeanma darangba namedake agan talate on'a man'ja, maina uan chengo mengo songdonggiparangni kam aro kattarangsan ong'bata. An'ching uamangni gimin knagenchim ong'oba, da'o ia chasongo uamangni agangenchim ong'ode golpo inesan chanchiatna mana'igen. Gonga Raksanpa mandeanma mitdeanma ba golpo mangmangsanma aro uara bino songdong a'chara chiga chiringachim namedake chu'onga sakirang dongja.

Indiba, je mandeba Gonga Raksanpa Gonga Terepani gimin katta agangenchim ong'ode, uamang an'tangtangnade uan Gongani ja'kol, uan Gongani na'chi knokram. Uan Gongani asongchakram ine je ro'ongo ja'kol ba ki'sangni chinrang dake dongako mesoke agana mana. Uandake uamangni mesoke on'gipa chinrangni gimin sandie niode, uarang pilakon ong'telaigipa bostu ba chinrang gitasa nikaia Beben, mittam ro'ongrangni kosakode "fossils"-rang dong'bebea Ia "fossils"-rangni gimin ba dongrikgipa chinrangni gimin namedake sandie niangkuna man'ode namgen.

Gonga Raksanpa, an'tangni nogipa namchiktang Gol-Dingde aro Miksim-Bangga, baksa agan mitakako man'a kene, ma'an a'song chigako wate brangbana nangaon ga'akaha Gongani jensalo brangba'on, uni namchiktang Gol-Dingdeba ja'rikbeaha aro A'chik a'songona sokbaha. Gonga apsan biapo songdong a'chukgija a songanti chigaanti re'roroe dororoe dongaha. Iani a'selsa Gongani dongani chinrangko a'songni pilak bakrangon nikna man'a. Gonga Chiring, Chibimarangoniko majal gale, chekcham bile Na'ma Na'sa tikma tiksa kite re'roroaha. Jensalo Gonga A'chik a'songona re'baa unosa Gongana "chichol baksoa, matcha biming mingsoa" ine A'chik me'aparangni agananio ngang.

Gonga an'tangni nogipa namchiktangko Na'ma kore Na'sa mitde-ni sokme gipbilata ja'ping chibilatani gimin bobil dingaha. Bobil dinge rikroromittingsomoio, Gonga, a'ning dedrangni ma'bitchiko, chipu chi rodotchiko, man'e on'ani gimin, a'ning dedrangni doka watani somoio. Gonga mamingkoba ra'bagija, do'aning do'chiningko gisik roe salgipako bi'e ra'baha. Uandake, Gonga do'aning do'chiningko aning dedrangoniko bi'e a'gilsak chigilboona rimdobaa saldobachengaha. Unoni intalsa da'alona kingking a'gilsako do'orang jelenga ine agana.

Pil'e Gongga Raksanpa, Na'ma kore na'sa mitde-ko gro dingmitting, uni Achak Matgrikni, a'song Te'matchio chiga Pongroo Udit Wariko gongdape Asro Wa'kanta Balrikra ba A'kimbrio Kilbolmani boksoriri, balengako, sing'ako nike supe-chengaha. Gongga ua Kilbolmako supena gita, Badak me'a Jodak Pante, Iidek chikama Malcheng wari rikamo rimbang roke a'tip songe, rua wagate on'aha. Iandakgipa rokomari dake Gongga Raksanpani gimin agananirang gnang.

Gonga Raksanpani gimin A'chikrangni agananio rokomari dake biming minge agananirang gnang. Gongako mittamrang, Gongga Gongsa Kama, Kada inebh minga, Mittamrang, Gongga, ine mingaia. Uni biming chu'gimikde, 'Gonga Raksanpa Gongsa Terepa' ong'a.

Gonga Raksanpani gimin agan golpoe on'anggipa Mariampur songni Ship G Momin (1979), Kalwe songni Kiljang N. Areng (1983 aro Rajasimla Rongdal A'timbo songni Wistoh D'Marak (1986) - uamangko dingtanmancha mitelna ska.

Ia ki'tapko chappa ka'na, chu'ongjagenchim ong'aba, dak-chaniko on'ahanina, Department of Art & Culture, Meghalaya-koba mitelna ska. Gongga Terepani gimin seanirang chu'sokgipa ong'aha ine anga chanchija, indiba jeko anga sandie man'aha, uarangni giminsa anga ia chongipa ki'tapo chu'soksranggipa ong'jaoba, Gongani janggi tangani gimin seaha. Uni gimin ia ki'tapko poraisoenggipa pilak ripengrangkon maiba namdapatani cholrang dongkuengode uarangko on'atpa'china mol'molata jedakode anga uarangko mikkang chango namdapatani dakna kusi ong'begen.

**Julius L. R. Marak**



# Gonga-Raksanpa-Gongsa-Te'repa

A'song Chiga.

Gonga Raksanpa Gongsa Te'repa bano songdonga bano chiga chiringa uko darangba namedake aganna aro mesokna man'ja. Uan skangni chasongo jeni somoion A'chikrang Mitde paksa mande paksa ong'miting, ua chasongo janggi tanggiparang ong'a. Indiba, bang'a manderangan, uni atchiram biapko aro a'song chigako Sagal chichang damsasas atchia ine agana. Ua sagal chichangni biapko jeon Gongako ba'a chi'achim biming mingon'na man'ja. Gongani ma'gipako Medi-Sali aro Pagipako Akok-Jali ine minga.

Gongao nogipa saksa donga jekon Gol-Dingde minga. Gongani namchiktang saksakoara Miksim-Bangga mingskara. Iamangan Gongani nogipa aro namchiktangrang ong'a. Gongani nogipa aro namchiktangko atchimiting somoio Sillangan silchi sikkuja, Patangan rai kakuja, a'an mangsi kakuja chian biding chitkuja, bolma danoriaienga, samsi wakkimilaienga. Matma matdambeaienga, dare akkaruaiengpitti, silchi me'gimuaiengpittichim. Unomiting somoio pilakan ganani chinani ba ra kancha dongkujachim. Manderang pilakan bol bigil, wa'a bigilrangko tarie gana china, me asarangba be'entangna wa'tok sine, mechikrangba be'entangna bolking kipe gantok chintokkuaiengachim chongmotan bang'batan nagande gana an'silgri dongtokkuaiengachim ine bang'a me'parangni aganano gnang.

Gongani Brangbaa.

Gonga adita dal'a chu'sokahaon, an'tangni ma'an a'songko wate re'na nangaon ga'akaha. Gonga an'tangni ma'an a'songko wate re'bae pilak a'song chigakon wene pan'e rogipa re'gipa ong'a. Gongani re'bamiting somoio manderang pilakan dakmandakon man'kuja, re'balbokkon chinkuja, kilbolmakon

den'kuja, kildingmakon rikkuja. Silchikon mikkang nikkuja, darekon de an'sengkuja, Me'gam songregipaba, Dikgil badiuggipaba atte silmang botaiengpitti, terik riking sitaiengpittichim ine agana. Iandakmiting somoio Gonga Raksanpa Gongsu Te'repa, a'gil-sak chigilboko wene re'baeming a'song Chuanggre (Suanggre), chiga Chudikgre (Sudikgre), a.song Nong-rengreng, chiga Nongchibingo, Me'gam Amillongo mande Asiljong ba Amiltongo ma'mok cha'e mipal enge adita sal aro jarangna songdongeaha.

Gongara maina an tangni ma'an a'songko, paan chigako wate re bana nangaha? A'chik me'aparangni agananio iandake gnan. Gonga an tangni ma'gipani a'songo dongmiting sal somoirango, an'tangni nogipa Gol-Dingde aro namchiktang Miksim-Bangga baksa, songni nokni agan-mitdakanirang gnanchim, Gonga an'tang kratcha'aniko dakgualmanahani gimin songni nokni agan-mitdakanirangna mikgil kratcha'e aro dongsiksakesa, ma'an a'songko wate re'baaha.

Gonga jensalo an'tangni ma'an a'songko wate re'baa nogipa Gol-Dingde aro namchiktang Miksim-Banggaba uko watatjachim. Nogipa aro namchiktangni re'bana watatjani gimin. Gonga an'tangni nogipa aro namchiktangna, narito nagitoe majam chekcham bile ronaka ine pa'sike aganesa tol'e katbaaha. Gongani iandake tol'e agananirangko, nogipa aro namchiktang bebe ra'jaha. Bebe ra'jaeming nogipa Gol-Dingde aro namchiktang Miksim-Bangga sakgnian o'gipa ba adatangke watgija dingding chapchap ja rikbajok.

Gonga ma'an a'songko wate katbaon, an'tang baksa jilatang ba'atang Achak Matgrik-Bijare aro Menggosil-Menggobalko rimbite katbajok. Uni Achak Matgrik-Bijareara Matma Matdambe gita, ja'te dikkaru'gita, wagam attepong gita ong'achim. Ukon A'chikrang 'Matgrik-Bijare' ineba minga. Indiba, A'chikrangni dingtang dingtang agananirango biming

dingtang mianganirangba gnan. Ua apsan Achak Matgrikkon, 'Sre Paleng-Ki-me-Gol'deng' ineba minga. Pil'e apskon, mitamrang Tari Me'a-Tasi -Pante' ineba minga.

Gonga ma'an a'songko wate re'baon, badia ramako re'bara? Uni re'bagipa ramakoba A'chik me'aparang ikgil ga'jepjepramko kasi sokme charamko, samek para witramko, kasi mri didiko ga dindine re'bara, ine agana. Ia a'song chigako re'bae badebamanoara a'song Mitdechak gita, chiga Salaram gita a'a gitok jangramko, chian bisik sikramko re'bataiaha. Unoniba pil'e da'obatai Huro mikking gipokko dingdingramko, Lau kongtok bijakni ritimram a'song Rau okningko chiga tangtimeko re'bataiaha. Pile ua a'oste dape a'proko pindape Danil matgil natramko Dikgilatte dokramko nappakbaaha Ua gita re'baon, Gonga Ajopana diltue Jobepana tiltoe den'boai, ine tobaaha ine agana. (/ jopara Do'grik aro Jobepara Do'be) Do'grikni da'o gangchengara Danil chimpongengasana aro Jobepana pa'chenge rapbo inara, uni hilangahaode bimangchonoba namen gam'a ine A'chikrangni bebe ra'ani gnan. Ukon A'chikrang da'onaba Ajopara diltue rapbo, Jobepana pal'kenge rapbo, ine aganengku.

Uko bademanno pil'e Tuarani a'songko Mangapani chidingko ua re'bataijok. Ia a'songara, Nokma gano wana re'gipani a'song ongachim. Tuarani ma'gipako Umeja Kaltima ine minga Tura chong. motkode Tere-Okma inesa minga. Ua a'song rua matteo chiga rong'pakmareo songdong a'charachim. Ua ia a'songo Salaramchi nokrangra one, wa'ambongko chidare sale, silchi krokra boksori krok sale, Muga a'ding sappori dake songdong a'chara. Uni ja manoba Gonga a'songaha didiko chiga a'gil mongsiko gantiko kakchengko karamko, jong'gilwengko Josengko neng, ramko Malasini Mirandani dingdingram a'songko kime sone re'bataiaha.

Uko bademano ua a'song sillang biriko chiga wa' te a'dingko, Ajemani a'songko Giljemani chidingko re'baaha. Aje aro Giljeni ma'gipako Benaru aro Pagipako Silgitu minga, ine mitam A'chik me'aparangi aganani gnan. Uamang sillang biri chiga wa'te a'ding sillang bibal balram rong'ma me'kin ong'amo songdong a'chaachim ine aganani gnan.

Uko bademan'oba Sippin ma'an a'songko balmin ma'an chiddingko re'bataiaha. Unoni a'song rong' tottoreko, chiga chameraguko re'baaha. Unomiting chachao Bonepa Janepara Rangbildi Rangbildara chri matkuja gro nikkuja kawak jilna pe'aia kalsin-nemna wang'aia ine agana. Kini wangoba ta'jongko ge'aia, chakku dilskuoba ta'jongko ge'aia ine gana. Mande agitalna be'en maronchina nang'ni chriko gelokko man'kujamiting somoi ong'achim. Ian Bonepa Janepani songdongram a'song ong'a.

Uni ja'mano Susimemani a'songko Sangkildomani chidingko a'an dru a'songko chiga dilmongko napbajok re' bajok. Unoniba bri rimrimba'on pattal sippeba-on, a'song dingdang ga'dapbajok, chiga dingdang re' pakbataijok. Uandake re'ba dobaon Gonga chichol baksojok, Matcha biming mingsojok. Ukon da'onaba A'chik me'aparang Gonga chichol baktima, Matcha biming mingtima ine agaaengkua. Unoniba ta'a narot chasinramko Miinma tuchikramko re'bataijok. Miini ma'gipani gro mikskurio tuchakana nachil ruakuni bamchakram biap ong'anasa ta'a narot chasinram Miinma tuchikram ine agana. A'anma jikjek jikjek chiinma pokpek pokpek pilak maharinan ma'chongnan Miini ma'gipa gakat gadobaa ine agana. Miini ma'gipa ua biapon tuchik tubame gakat gadobara A'chik a'song chigaona.

Pile uko bademano chigil anti chimanganti chisel anti biap anti chibisikko ja'rike dilmangmako sandie maa gale chekcham bile aru ga'kang ga'kange chek sku-

nangkang nangkange dake re'bijok. Uandake Gongga a'song Sanachion chiga Imbanggio Gongade maa bile chekcham bile aru ga'kang ga kange cheksi pinange salsao roangengachim. Uandake majal chake chekcham bile Gongga-Gongsa-Kama Kada Ildekona sokange na'rim na'wakna chokkil churina majal chakenga chekcham bilengachim ine agana.

A'an dedrang chiu songrang gittimni a'songara gittim an'senga sara baljokao dongengachim. A'an dedrang chin su'drangba mikkang nitoa, bimang daknangachim. A'an dedrang chin su'drangni mikkang nitoako bimang daknangako nike, Do'reng ganggipok chiduala, a'an dedrangna chiu su'drangna mikchae-ming namnikeming jom jok maljok. Uko rim'a man'e, a'an dedrang chin su'dranga Do'reng ganggipok chi dualko grang ake ja'si sote watataha. Do'reng ganggipok chidual ka'o nange krat cha'oming, chingbas-kajok. Da'mo bia da'osa angkoba iandake sasti on'e rona man aigen, angaba grang chu'sokkuchina ja'si ritimku'china niskagen, ine gisiktango ku'chinge dongengachim. Iandake dongmiting tiktakon a'ning mitap chining srangoni chipuchi rodatchini ma'bitchi ma-ambiba, do'ku rengbalmachi re'bae warion chipuchini goleng sate na'katok me ram rame rodengako nikate injok: Da'ode angaba na'simangko jakogrik man'aha. Indine agane ja'chi kepbite ku'chi balbite, bolgisidengo rongma chokdengo ma'bake cha'na dakengachim. Uandake A'ning Saljatchi Salkambalko do'reng ganggipok chidualni balmisi-bae baldorengbae rongma chokdengo bolgisidengo cha'nasiengmitingon, Gongga Raksanpa Gongsa Te'repa balmatchi wari rikam gita re'baeming nikdi-kejok. Gongga do'reng ganggipok chidualni chikkap balkape cha'na dakengako nike injok, Aiao! na ade Ganggipok chidualde, maiako man'esa bolgisidengo rongma chokdengo subit sugile cha'na dakengabia, da'mo nang'ko anga ku'chi hohoe jakchi

taptape to'tro ong ate jagipuatgen, ine sriksrik ma-  
 luangaha. Maluangenba Gongga ku'chi hohoe jak  
 chi taptape cheksrichi dokdingate golsrichi engding-  
 ate to'tro onge jagipue do reng ganggipok chidual,  
 A'ning Salja'chi Salkambalko jaktuat jakwatangjok.  
 Do.rengni jakwatange ga'akbaako maiko mancha  
 watgal dongalanga bia ine Gongga Raksanpa Gongsu  
 Terepa re'ange nion, chipuchi roatichikosa nikejok.  
 Uandake Gongga chek 'de'mitingo Korengpa Kopin-  
 pani Ganggipok chidualni Mikbanda ja'si kandani  
 supitako sugalako chikkapako balbitako tikbitchiko  
 ru'danangko tinkiningako tinmitapako man'rike  
 sosrome cha'na namgine weringkolna re'ange an'tangni  
 dokdusimchio biksai ja'teo re.koksio sing'kokbalo ka-  
 dep nol'depe kerongchu kerongpange, namgine ine  
 dengkong jako cha'mesal cha'mebalna ine ra'angenga-  
 chim. Iandake ra'angemingara maja! chakangtaiku-  
 aha, chekcham bilangtaikuaha. Gongga A'ning dedrang-  
 ni Misi songginangni ma'bitchaiko ma'malako Do'reng  
 Ganggipok chidualni balbaako man'sojok niksojok.  
 Do'reng ganggipok chidual, A'ning a'sak dengan salo  
 Misi Saljong toan salo, Kesuni dengan sa'o, Kebongni  
 toan salo uchi bil'dik bil'dak, uchi bil'jip bil'jap,  
 inchi tip tip toangmiting, attam taktak pringo tak-  
 tak takkamaijok ka'sikkimaijokchim, Korengpa Ko-  
 pinpa-Ganggipok Chiduala ine agana. Unon A'ning  
 dedrang, chini songgiaanga, achi dingchina achi  
 rengsichina, aiao, gro dingna nanggne a'sel tona  
 kengne ine bitchi on'jok kual kanjok. Korengpa  
 Kopinpa Ganggipok Chidual ringa okkajokon, cha a  
 okkajokon attam taktak gopjop gopjop pring taktak  
 gopjop gopjop dake someiko re'atjok. Una kangipa  
 on'giparangara ka'o nangjok aro inaha, iade bikma  
 okkriana gitok ringna sikana tol'engasa. Kangipa  
 on'giparang ka'o nange an tangtangni gro dingachini  
 sokbae Ganggipok Chidualko grang gangsojok ja'si  
 ja'sotjok. Unasa Korengpa Kopinpara Ganggipok  
 Chidualara duk man'aha aro a'jak sokna chingskaaha.  
 Duk man'e ua attam gopjop pring gopjop dake  
 dongaijok.

Korengpa Kopinapani iandake dongengmiting tiktako, Misi, Chame Appara, Saljong Bola gipia a'ko wenbaenga chiko painbaenga, ku'o ku kip ku kipe jako rengsi ra bite a'dapako dapdape chudapako cho'pake a'ko wene chiko painbaeming nikejok. Uandake re'bae nike, maiko dakenga' na'ara ine Do'krupa Sanepako Misi sing'e'jok. Aiao, maicakra a ning dedrang Misi songinang angko ja'si ja'sota grang gangsim'amai ine ine aganchakaha. Ua aganchaksikaaha, maina manengenga na'ara, intang grang gangritimo ja'si ja'ritimo a'ning ma'bitchiko chini dokkkandiko subitchi subalskabora. Na'a gro tobo a'jak sokbora, ine Misi, Chame Appana Saljong Bola gipiara ku'patiangaha. Da'o na'ara maina manenga, bolgisideng bolmao rongma chokdeng dotsao grang gangbadalsobo ritimchina, ja'si ja'a badalsobo sinilchina. ine Misi ku'pattiangaha. Una Do'reng Ganggipok Chidual da'alona kingkingba mikka wasisie sal rakbaode bolgisirango ba'e ja'a aro grangrangko badale salbaramrongenga. Do'reng Ganggipok Chidual ja'a aro grangrangni ritina chu'sokaha oara, Misini ku'pattiangaha gita Saljongni skianga gita a'ning ma'bitchiko chining dokkandiko gana a'gilwita-ko sokme gijip jipako gol'eng satsipsipako, sara do'o mi rikako unon subitchi sugalangjok. Nanggrakna nangtinge salgisakna gitote sugalargon. Do'reng Ganggipok Chiduala bano ja'dengdalanggnok bano rodengdalangnok, ja'ja ja'delbajok grang gangchimitbajok ine agane niwilwale niaha. Niwilwale am'bingbange nion, a'song sanachion, chiga imbanggion bolgibolgengwa'ko nikaha, rongma chokdeng dotsako man'aha. Anga iano ja'nengtakgnok rongjengdalgnok ine ja nengtakmiting tiktako Gonga Gonga nikataha.

## **A'ning Dedrang Ja'kurik Ja'kusanbaa.**

A'ningni dedrang chini su'drangba Amako banna ra'gen bitchiko banona balgen ine amako sako bilangakoba nisretgija a'ko re'angakoba dondikgija kinte binekakoba watgija, mesalakoba watgija uamang rikbatokangechim. Uandake rikbaon uamang Mil'am achok achok de baenga, Seppikorok korok ra'baengichim. Chipu chi rodachini sadotchisa kimbalba ukon ja'ma rike ja'ku sane am'bae sokbatokaha Sokbaon Gongga Raksanpako nike sing'jok. Na'ara maiko dakenga, Gongga Maiko dakna. Ma galenga chekcham bilenga angade, ine Gongga aganchakaha. Ma galenga chekcham bilengane? Oe, ma galo man'jamai chekcham bilo man'jamai ine aganchakaha. Na'simangara bachinasa jinma grau grau dake Mil'am pongrikeng ra'e, Seppi gingritchok de'e re'tokenga? ine Gongga sing'sikaaha. A'ningni dedrang aganchakaha, chingade Amako rikbaenga bitchiko sanbaenga. Na'a niksopa'ama, Gongga? ine sing'aha. Bao angade niksoja, ban mai dakgipa na'simangni ma'a mai dakgipa na simangni bitchi, ine Gongga aganchakaha. A'ani dedrang chini su'drang, Ama bitchi ang dokandiko Do'reng Ganggipok Chidual balkape chikkape ra'baa, ia gitan katbaa, ine inaha.

A'ningni de'lrang sing'taijok, ua nang'ni re'koksio kegipa denggong jako ra'gipara maiasa? Gongga Raksanpa aganchaktaiaha, "Aio, iad: chipuchi rodatchi chongmitchengsai, da sio Do'reng Ganggipok Chidualni ua bolgisidengo rong'machokdengo cha'nasiengako ku'chi hohoe jakchi doktope to'tro ong'e jagipuatesa jaktuatangako cha'mesal cha'mebalna ine ra'enga angade, ine aganchakaha. Unon A'ning dedrang intaiaha, uanba Amake, uanba bitchike. Ah! oema? ianma nang'ma bitchia nang' dokkandia. Aio, indakede namjawa, ha ra'angbo. ine Gongga Raksanpa Gongsa Terepa on'atjok. A'ning dedrang, ra ripee on'pabo choe sok-



atpa'bo na'a ine mol'molaha. Gongga sing'aha, iako angni ripee choe on'oara na'simangara angnara maiko on'gen? Uamang kusi ong'an gape inaha, Aiao, nang'ni man'soesa da'nang. Chingade Ama bitchikode nika-jawa man'ejawahachim. Chinga nang'ko jakari jakbrade watatjawa, jakna on'e ku'na botesa watatgene. Uni gimin hai mama na'aba chingni songchi re'bo, ine rimon Gongga re'na jechakbeachim. Indiba uamang kusi ong'an gape dongija cha'gija rimani gimin, Gongga an'tangni Achak matgrik Tari me'a Tasi panteming, menggosil menggobalko mimbite chipu chi rodatchini songchina re'angaha.

Uamang sokangon, a sakni pilak ong'a obostarangko A'ningni dedrang agane on'eaha. Uandake agane on'on, songo noko dongsoenggipa pilakan kusi ong'bee Gongga Raksanpako mande ra'e birong chane rimchaksoaha. Uamang Gongga Raksanpana chua menil bitchiko cheke, waka okchanggipokko doke on'jok. Gongana chu kanmiting somoio Tari me'a Tasi pante, Menggosil Menggobalde grit bario te'rik bagano te'rik mina am'roroe cha'eming uamangde ki'me wa'gong rippatko Ja ching Chambil bu suko gisik watatgipako gaga ra'gipako nikjok. Uko nikbaenba iamang Gongga Raksanpana doka watatode iako bi'on namgenchim ine chanchie Gongana sriksrik agane on'na miksongaha.

A'ningni dedrang chini su'drang Gongako mande ra'e birong chane, inaha, aiao, Gisilko gitelchikgine, gitolko bra surgine. Nang'ni bi'a gitade on'gine nang'ni nanga gitade botgine, ine Gongana A'ningni dedrang ku'rachakjok. Na'a badi gita nanga, Ranga Gore inoba, Rikchi nade inoba, Akom Matrong inoba rurue toktokemangba on'gen, Ama bitchikosa on'pilna nanga.

Uamangni mande ra'e birong chane, on'ako chekako ringon cha'on, Gongga chidikna re'na

sikjok nokkalbongchi roangna sikjok. Chidikna re-na sikenba, Gongga nokgilchi a'palchina ong'katbajok. Gongani a'pal chidikna ong'katbamiting tiktak somoio, Sireng ja'sirengara Ruram ja'tak-kimara guareo prapsao chongtilao gingmatting ringrang ringrang ki'meting tingtang tingtang grangchang knatona kra kra gisik wate roe salako Gongga nikjok. Unon Gongga ui'jae, aiao, bimang mai dak-gipa biming mai minggipa gisilkode nangjawachim gitolkode ra'jawachim, anga iakon bi'gen ine chanchiaha. Sirengrengni gisikwatako nike, Ruramni roe salako man'e, Gongga skango miksonga gita Gisil Gitolko ra'na bina miksongjaha, indiba ia do'aning do'chningko Gongga a'ning dedrango bi'na miksongangaha.

Iandakmiting tiktako Tari me'a Tasi pante Menggosil Menggobalba, Gongga **Raksanpani** chidikna ong'katbae Sireng ja'sirengni - Ruram ja'tak-kimni gisik wate roe salako knatimmiting tiktako nikate re'baenba, sriksrik agandape on'jok. Gongga, na'ara uamangni kena botatode jakna on'atode gipinkode ra'nabe, iakode nangjawa, iade angon bang-bea angon jelbea, ine aganchakaibo. Na'simang on'atna skode, Ja'ching Chambil bu'suko, ki'me wa-gong rippatko gisik watatgipako, gaga ra'gipakosa on'atbo, ine bi'pabo.

Chua menil chekako ringman cha'ma~~o~~oara, mia jaha gorimko song'e, waka bimil mangsako doke on'jok. Tari me'a Tasi pantenaba Menggosil Menggobalnaba cha'china ringchina on'jok. Uamangni cha'man ringmantokahaon, A'an ~~dedrang~~ chin su-dranga, Gongga Raksanpa Gongsa Terepana doka watna ine rikgitok sagreko do'katchi bisosiko on'aha. Iandake on'aton, Gongga Raksanpa aganchakaha, "Aiao, iade angon bang-bea, Amaon jelbea, iakode nangjawa." Indiba, na'simang nangnikode on'atpana

skode ki'me wa'gong rippatko Ja'ching Chambil bu-  
 suko gisik watatgipako gaga ra'gipakosa nangachim',  
 ine bi'aha. Unon uamang aganchakaha, aiao, uade  
 mamingnaba gamchatjake mama, ada. Indiba na'an  
 ukosa nangnikode, nang'ni jeko bi'a ukon chinga  
 on'atgen, ine inaha. Nang'ni ka'namnikode tonam-  
 nikode rim'angaibo ra'angaibo, Gongga, ine agane,  
 gringsni joljasni chipe a'ningni dedrang tariatjok.  
 Gongga Raksanpani bi'a gitan, a'ningni dedrang do-  
 aning do'janingko dringsni chipatjok joljasni on'at-  
 jok, gitok rim'ani dike chikani on'ataha.

### **Gongga Raksanpa A'gilsak Chigilboona Re'apila.**

A'ningni dedrangni tariatgipa do'aning do'janing-  
 ko dringsni joljasniko a'gilsak chigilboona Gongga  
 ripee chorebae ra'baenba rong'gipeng rong'sajao  
 (Gabil a'ja) Rong'gipengko rong'duule rong'teke ji-  
 laha. Gongani rong'rue rong'teke jilegipa a'song  
 Chotcholja Damcheng Gabil Mitdegrak Chiga Rong'-  
 banggre ong'a ine agana. Gongani uandake rong'ru  
 rong'tekmiting somoi tiktakon Misi sokbaenba nika-  
 aha. Gongani rong'ruako nika Misi-Biare-Saljong-  
 Biare, maiako rong'rua maiako rong'teka Gongga, ine  
 sing'eaha. Gongga aganchakaha, angade Sireng-ja'si-  
 rengko Ruram ja'takkimako a'ning dedrangni chin  
 songginangni on'atako botatako rong'ru rong'tekenga  
 ine aganchakaha.

Menggosisl Menggobalde an'tangtangna on'atako-  
 de Ildekona sokbagija Saljengpatra rong'dogacholona  
 ra'anggijan ramaon cha'e bon'atbajok. Uni gimin  
 Gongga a'palo donode iamangde angni palkoba chike  
 cha'gen ine napna man'jana gita tarie rong'ru rong'-  
 tekaha. Jegita rong'ru rong'teke donomangba nap-  
 na chol am'e jaknokaia bawanggiaiaha. Una Gongga  
 Raksanpa, iamangde iano donchaiode bakoban bit-  
 ponge cha'e bon'attelgen ineming Daruseng Imbang-  
 giona bon'ckon rim'ange unoba name rong'ru rong'-

teke jiletaiaha. Ua biapchinaba Tari me'a Tasi pante Menggosil Menggobalara ja'rikangenba jakknoketaiaia bawanggetaiaiaha.

Aiao, iamangde agre ong'bebeake ine Gongga chipu chiko wa'jolko do'o baksa chipchape donskajok. Gongani iandake donako ma'sijae, Menggosil Menggobalara re'baenba jakknok bawanggetaiahaon jakchi chipu chi rodatchiko rim'bilekmanjok. Unosa to'tro ong'e jagipue jakko sale katjok. Indimangba, Menggosil Menggobalara maniteljaha. Maniteljani gimin, Gongga Raksanpa Gongsu Terepa, inghing jilsrangjaon nambatgen ine ka'o nange atmachi seginchi gimikkon rim'gope kachao chipe ra'angemingara palaha. Gongani iandake atmachi seginchi ra'angepalemiting tiktako Misi re'baenba nike sing'aha, palgenma na'ara ukoara?, Gongga aganchakaha, oe, angade palengai. Misi sing'taiaha, maina palgen? Gongga aganchakaha, 'Gisilnasa on'genne, Gitolnasa palgenne, ra'genma? Unon Misi Susime aganchakajok Misi-Saljong-Dakdambe ku'pattijek. Aiao, Gisilnasa palode, Gitolnasa botode segrina man'jawa tanggitikde cholijawa. Na'ara cha'sippa palaiibo mi sromna on'ai-bo, ine, Misi-Biare-Katchi Susime Gongana ku'sik-kie ku'pattie on'angaha. Gongga bon'chotao be'en maronchina mande agittalna sisa goldiksana jaksan ge sana pale dine nioba ra'jahani gimin gimikkon ra'ba-pile re'baaha. Re'bapilenba, Gongga do'o kacha gimikkon Do'gok a briu rokroke wate donbajok (Do'gok a'bri Badakka songni Salaramchi pak donga). Do'gok a'briko Gongani do'o kacha gimikko rokroke wate donbaani giminsa da alona kingking A'chikrang, 'Do'gok A'bri, ine mingsing minggamenga.

Do'gok abrio do'o kacha gimikkko rurue toktoke galbaani ja'mano, mitam, A'chik me'aparang Gabil-Mitdegrako Chiga-Rongbanggreo Gabilko ma' nok cha'e ua biaposa rong'ru rong'teke songdong a'chajola ine agananiba gnang. Indiba, banga A'chik me'aparang,

**'Badakka' minggipa songonasa re'bae sao ma'nok cha'gen, bano mipal enggen ine sandioara, Badak adasa-Kodak mamasani noko ma'nok dakejok mipal engejok ine agana.**

Gonga, Raksanpani Badak adasa-Kodak mamasani noko donge ma'nok cha'e dongmiting somoio, china dongge chitna na'na cholasina ine biap bicham nie dongge kitengachim. Unomiting somoio, Tari me'a Tasi pantea Gongani do'aning do'chining man'bagipako chike cha'na man'jeanba, Do'kongsi Balnapako Kongraru Janepako besa kae ma'gipana tol'e onna chanchiaha aro besa kaaha. Unandake Dol'jot Do'kujot besa gimal kae Gongako dakmajojok tol'rurae aganjok. Aiao! ma'gipape marengsitde u'ija-engjok, nang'kode Gongade manengbeengjokai. Nangni depantede Gongade kni boksree bokjok wagam wamisi chajok nokkam danggamsajok. Na'a re'ange bimang rujeebona mikkang dakjeebona ine tol'e on'ejok,

Gongani ma'gipa, uamangni tol'e agana katta-rangko bebe ra'e aganchakjok. Aiao, gipin ong'ja ang' de gipin gipi gitade bimang dal'jaanasa manenga, kambe chujaanasa manenga. Iandakesa dakengama indide inenba, hai anga dakgitchigen rugitchigen ine angade re'baha. Ma'gipa depante Gongako dakgitchu rugitchuna re'baon, Mul dokatchiko, rimbang siljanggiko gengbing gengbang ra'e, silsikkepko chengging chenggang ra'e, a'ko wene chiko pan'e re'bae nion, depante Gonga Raksanpani Gongsu Terepani dongge chitengakosa nikaaha. Ma'gipa re'baenba Gangani dongge chitao pin'tiltil najoke sokenba grongeaahon, Gonga jagokman'pile ma'gipako sing'aha. Aiara bachinasa Mul do'katchiko, Rimbang Siljanggiko gengbing gengbang silkepko chengging chenggang ra'e re'bara da'alde? Ma'gipa aganchakaha, Na'ara bimang dal'atana kambe chuataana ka'o nangenga bika soenga ine agana. Wagam wamisi chajok, kni boksru bokjok, nokkam danggamsajok, mikkang rujeebo bimang

dakjeebo ine na'an aganatanaba. Unasa dakgitchu rugitchuna re'baengai angade, ine aganchakaha.

Gonga ma'gipani agana kattarangko knae jagok-pil'aha aro chanchiaha, aiao, sawasa tol'a bia, angaba on'tisaba inkuja sakgipinba saiku'ja. Da'o dipet mang-mangde angara mamingba saa ding arangba dongpaku-jaehim, ine aganaha. Gonga ma'gipao sawasa iandake tol'e on'ea ine sing'on, ma'gipa, nang'ni Achak Matgrik'an atmao segino angan aganatake, ine aganchakaha. Atcha, jeba nang'na tol'e on'chinajok, indiba na'ara da'ora angkoara mai daknakenga, ama ? Mikkang dakjenakama, bimang rujenakama ? ine sing'taiaha. Ma'gipa aganchake inaha, oe, angade una miksongen re'baahani gimin, mikkang dakjegnok bimang rujegnok. Gonga ma'gipao sing'taikuaha, atcha indide, na'ara, angkoara mikkang dakjeoara bimang rujeoara bano chiripnaka, bano ka'sinatnaka ? Hai wariko mesokbo, ine ma'gipako rimaha. Una Gongana wari mesokna ine ma'gipa rimangaha. Rimangenba Marirang ja'singkolko, Monggosil dipsrangko ma'gipa mesokejok. Gonga ma'gipana aganchakaha, aiao, ianode angkon gilgipjawa, angan ka'sinjawa ine jechakmika dakaha. Una pil'e ma'gipa Gongako gipin wario-na mesoktaina rimangaha. Rimangenba Gongana Dokureng Balmatchi wariko mesoketaiaha. Ua wariko mesoketaion Gonga kene jechaka daktaiaha aro inaha, 'Hing, ia wariode ka'singen, inode gilgipgen, indiba angko dakna runa skangba, nang'ni ra'bagipa Mul dokatchiko Rimbang Siljanggiko nina on'chengbo, angko ding'atna man'genma man'jawa nichengna, ine bi'aha. Ma'gipa Gongani bioba on'gija, dakgitchina rugitchina inesa Gongako rikaha. Ma'gipani rikani gimin Gonga katjok. Iandake Gongani katmiting somoio Menggo a'pro Menggo kin'dikara, Sireng Ruramko rong'rua rong'tekako chikrikae balrakae cha'na man'na gitasa Kongraru Janepako Dokongsi Balnapako besa kae gimal dake, na'ara tol'bone, ine walmanchi waltiknie on'jok. Iandake ma'gipani dak-

gitchi rugitchina Gongako rikrurumiting somolo, Menggosil Menggobalara chikrikgana man'aha. Indiba salsao Jikgipa Norimit, Nachimit namen saa bilong-beaha. Saa namkalbahaon, an'tangni segipa Menggo a'pro Menggo kin'dik ba Menggosil Menggobalko injok. Na'ara be'en bitin man'e on'paja, gipinchidé man'e on'a. Uandake jikgipa, segipako pring taktak, attam taktak ku'sik tipgija injok ku'rang bon'gija saijok. Una Menggosil Menggobal jikgipako ka'o nangenba, Gongani rong'ru rong'teke jilkuenggipako bon'e chikrikgae balrikgae on'jok. Unosa jikgipara kusi ong'aha, seko man'e on'ani gimin mande ra'aha. Gongani jilgipa Sireng Ruram jekon Menggosil Menggobal bon'e chike cha'na man'jachim, uarang pilakan dongsparangde bilbrang bariangjok. Iandake ong'a obosta gimikko Gongga, ma'gipani rikani katenba, an'tangni rong'ru rong'teke jilgipa biap gitan katpakba'e nikejok. Gongga an'tangni rong'ru rong'tekako naue nioara Sireng Ja'sirengde mangsaba dongjajok. Gongga an'tangni rong'ru rong'teke jilgipa Sireng Ruramko mangsaba nikjahani gimin ka'o nangne bika soe ma'gipani rikoba bitchitangni rikoba Mrenpa-Rongdingpako Tong'sang-Miksangko gingmatko Repgalgipako basuko bakjak bakjak an'tangni rong'ru rong'tekako basuari bakjak bakjak? chipe donangskajok. Menggo re'baenba knoketaiode ba cha'na re'baode kenchina ba jagokchina ine dake donangskajok.

Bean bebe Menggo a'pro Menggo kin'dikara Sireng ja'sireng Ruram ja'takkimko an'tangni rim'ronggipa biaponiko rimitaina ine re'bataie jakkinoke bawangite nietaiaha. An'tangni rim'ronggipa biapona re'bae jakknoke bawanggeetaiora Mrenpa-Rondingpako dangbilek rim'bilekmanemingara kenjagoke jakko sale kataha aro noktangchi re'angpilaha. Kene katange nokona sokangon an'tangni jikgipako manengaha. Nang'ni cha'na ska ringna skana ge'etako man'e dakara angasa janggi sina am'e jama cham'na am'e dakjok ine ka'o nange jikgipako dokejok.

Ma'gipani rikana Gongga kate kate nioba amchakjaha. Kate nio amchakjae, Gongga ma'gipao inaha, Atcha, jeba ong'chinajok, Ama na'a dakgitchiaibojok rugitchiaibojok, indiba angna on'tisa nang'ni Rimbang Siljanggiko on'chengbo, anga nichengkuna. Gongani nina bi'ani gimin ma'gipa on'aha. Ma'gipani o'narian Gongga Rimbang Siljanggiko bak ra'enba warichi galsruatjok. Ia biapkon A'chikrang da'alona kingkingba, 'Mitde Silkam Na'gil Maram' ine mingengkua.

Gongani iandake galatani ja'mano ma'gipa duk ong'e aganaha, Gongga, angara daode maichi dakgitchikugen maichi rugitchikugen? Gongga ma'gipani iandake sinteani gimin inaha, Ama. na'a angko dakgitchi rugitchina nangtaijawaha, nokchi songchi re'angpil'aibojok. Gongani iandake agana kattarangna ma'gipa duk ong'e Rimbang Siljanggiko ra'do saldochina ine Matram aro Ki'sing pil'engko ge'etajok. Ge'etana ra'do saldoe nioba, uamang ra'do saldona man'tokja-jok. Ia Do'kureng-Balmatchi wariara, Menggomako ja'skil raram, Salgrako ganduri galram biap ong'ani gimin namen tu'beachim. Gongga an'tangde ma'gipani an'tangko dakgitchi rugitchina ra'bagipa Rimbang Siljanggiko ua warion galsrue donangenba noktangchi re'angpil'aha.

Gongani ma'gipaba pilakkon ra'do saldochina ge'ette nioba man'jani gimin a'ako wene chiko pan'e re'ange skango an'tangni ku'chite ja'chite watatgipa bi'sa Mune-Saneko grongna ine nappakangaha. Re'angon ua bi'sako tuate donengako nikeenba de'tome nion, bi'sa to'tro ong'e jagipue grapaha. Iandake bi'sani to'tro ong'e jagipue grapode, 'ma'gipa ka'laka' ine A'chikrang da'alonaba bebe ra'engkua. Gongani ma'gipa ia biaponin joljol songtang noktangchina depanteko dakgitchi rugitchina man'jae re'angpilaha.

Gongani galchipue galatgipa Mul do'katchiko, Rimbang Siljanggikoara ja'mano, Do'takchil adasa,



Nanai mamasasa balritting 'chikritinge ra'angaha. Ra'angenba uamang da'alona kingkingba atte dok-enga mul jipenga ine agana. Do'bakchilni chulchul ine mikogipara atte dokengasa mul jipengasa, ine A'chikrang bebe ra'a.

Iani ja'mano Gonga an'tangni Nokpante Jam-sirengo Gabil Mitdegrako Chiga Rong'banggreona re'-angna nangaha. Iandakmiting somoi tiktako nam-chiktang nogipa Goldingde Miksim-Bangga mang'ara ko'augija ko'miksugija, k'ni gisi galgija, ja'anchinek natgijaba jarojok kuarako tumik tunaka ine aganaha. Indi ine agane Gabil Mitdegrako Chiga-Rong'bangreo grak mandeni dakmiting chikong tanu dakmitingo jakko chichie sing'o de'e ra'e re'angaha. Re'angon kuako miksue ja'an kini gisi galmitingo, rim'sa rim'-ronga, rua rim'ronga, kime bolkamara mikkang amsu-ruara pakrurubajok trakrurubajok.

Pil'e Gonga Ambareni chichoo bolkaruni dekdoo songdongaha. Iani songdong a'chamitingo Kalgra Kalgimalara, Me'gam ma'drangko Dikil mahariko gro dingna re'angaha. Re'angon Mrenpako jal'lang chane Rongdingpako dolong kae, jal'lang malmiting somoio aganaha. Ru'at da'a den'ane, tampi da'a dokane re'miting domiting somoio. Uni iandake aganako knaja'e kala nating ja'man re'gipara, ru'at kam'e den'atjok, tampi tap dokatjok. Uandake ru'at den'aton tampi dokaton, Mrenpa Rongdingpara gogoreng chil-darengangjok. Me'gam songginangko Dikgil ma'drangko denn'a re'ara Kalgra mahariara unon ga'ake sripe sijok.

Unon Mrenpa Rongdingpana mipal dintimgipa chite gattimgipa, Na'ma Badanpa Uma Rangginpara, O'gipa dongjajok, mamatang grijok, sana chite gat-kuna bano mipal dinkuna ine katangjok. Uamangni iandake katangon pilakan prakbajok rurubajok ka-ginan, bilginang dakbajok. Ia a'sel ong'miting somoi

tiktakon Gonga na'notang namchiktangrangni au mik-  
 sugipa biap gitan an'tangna dongge chitmitingo mi-  
 pal dinchina chite gatchina Me'gam Amillong-Dikgil  
 Amiltongni demechikko na'no nokpang namchik ja'-  
 pang dakna rime re'baaha. Gonga uandake rime re'ba-  
 mitingon Na'ma Badanpa Uma Rangginpaba ka'o  
 nange bika gape katbaengani gimin, Gongani na'no  
 biokko Gongani namchik jakpako, Goldingde Miksim  
 Banggako ja'pingni biambongo sokmeni bidualo,  
 ja'pingni giting gitap sokmeo tokteknalek dake gang-  
 ching nangatbajok ki'me satpakbamanjok. Unasa Gol-  
 dingde Miksim Bangga kene katjok. Angni ja'ping  
 sokmede mai dakjok, mai ong'jok ine O'gipa ma-  
 matangchi, Gonga Gongsachi re'ange mesokeaha.  
 Gonga attamo nokona sokcon namchiktangni sokme  
 gipilako, ja'ping chichilako nike inaha, ah, Na'ma  
 Mitde gnangke Na'sa kore gnangke, Na'ma aia ong'-  
 jake Na'sa aia ong'jake, mai a'sel ong'a namchik,  
 ine sing'aha. Unon namchiktang Goldingde Miksim  
 Bangga aganchakaha, da'si salo ko auna ko'miksuna  
 ine re'ange aumitingo Na'ma ki'me dokpake, Na'sa  
 gangching satpake sokme gipilata, ja'ping chichilata  
 ine agane on'aha. Gonga inaha, hare! Na ma kore  
 Na'sa Mitde mangmangsa angko chonniknakama?  
 Banona kate jokgen anga peku chitnaka gangching  
 pe'naka gro dinggine a'sel togrine, ine chiringantiko  
 chisikantiko majal gale chekcham bile rikbajok. Rik-  
 bae nienba Gonga Mitde Silkam Na'gil Maram biap-  
 oniko sate am'baaha. Unoniko Gonga rong'te songpeng  
 songpenge samdim sapeng satpengeba cha'milmal-  
 kura cha'mesalkuna ine cha'kimal cha'mesalmitingon  
 Na'gil Maram Mitde Silkam biaponi Na'ma Na'sara  
 katna chol ong'jaha. Gonga Na'gil Maram Mitde  
 Silkam wario rong'te songpeng songpenge samdim  
 dongpeng dongpenge chakahani gimin, Na'ma Na'sa  
 maidake janggi joknok ine chanchiaha. Janggi sina  
 nangainok jaina bon na nangainok janggi jokani grijok  
 jama naljokani dongjajok ine Na'ma grapsiaha Na sa  
 maja niaha. Gonga Na'ma Na'sako Gringrang Sal-

japango srapienba, ianon peku chitgen ine song'me-  
mang chanmemangako cha'mesal cha'mebalna asonge  
cha'na a'bachengaha.

Na'ma Na'sani iandake sintie grapsiako a'song  
Te'matchichini chiga Ponggrooni songdong a'chagipa-  
rangara knaaha. Grapsiako knaenba Ang'kerong  
adasa Dramchongma mamasa re'bae nion chibisik  
rong'japango bame ka'tappo ka'tappo rang'sitsokgija  
kene dongengako an'tangtangni nokpante jamsirenge  
roaoni ong'katbae re'bae nienba nikeaha. Ang'kerong  
adasa Dramchongma Na'sa Na'mana ka'sachake,  
an'tangtangni biking danil gita Grong adil gita ong'gi-  
pachi, a'ning mitap chining srangchina kitmemangang-  
jok uchi danok donejok. Na'ma Na'sa a'song Te'mat-  
chiona chiga Ponggroona katangna man'enba jokang-  
aha. Kate jokangon, na'ara maina kane katenba  
grapsia, ine Ang'kerong sing'aha. Una Na'ma Kore  
aganchakjok, Aiao, angni dukkode maiko aganku'gen,  
angkoke Gonga Raksanpa peku chitna gangching  
pe'na am'e rikbara. Ua an'tangde cha'mesal cha'me-  
balna re'angenga ine aganchakana. Unon Ang'ke-  
rong adasa, Dramchong mamasa inaha, ah, iandake  
dakode nammangmangjawa, ia chibimaode sawa dong-  
kugen, uni gimin maiba jokani cholkode dakna nang-  
gen ine aganaha. Uandake aganenba, Ang'kerong  
adasa, Dramchong mamasa, Na'ma Na'sana Simsang-  
chi bitmemang bitanoke watataiaha. Na'ma Na'sa  
Ang'kerong adasani dakchakachi jokangaha.

Gonga Gonga cha'gro cha'mesalmano Na'ma  
koreko rim'na ine chichi ong'onangoara Na'ma kore  
Na'sa Mitdede dongjajok. Aiao, Na'ma kore Na'sa  
Mitdeara bachijoksa ine am'bingbange a'kol nika  
damantiko knokgrike knokgrike nioba nikjajok, niwil-  
wale changgrike amo'ba man'jajok. Nikja man'ja-  
telani gimin, Na'ma kore Na'sa Mitdede gimatelaha,  
bachina re'anga bia ja'kurik ja'ku sane nigen ine  
rikbataie niaha. Rikbataie nion, a'song Tematchio

chiga Ponggroo man'etaijok. Oh! Na'ma Na'sade ianon'jok, da'ode jako man'jok, miko nikjok ine Gonga peku chitna gangching pe'na man'gnok ine kusi ong'aha. Da'mo nang'ko anga chichi ong'onangkuna ine chanchie, Te'matchi-Ponggroo wari rikamo adita neng'takmitingon, Gongani rimbitgipa Tari me'a Tasi pante Asro A'brioniko Kilbolma goako chiningchiko nione ga'kitkite sing'boboako nikaha. Na'ma Na'sako Achak matgrik nikenba singenga ine Gonga chianchiaha. Tari me'a Tasi panteni iandake sing'boboani gimin Gonga maiko iandake sing'enga ine chanchie sambaona re'ange nicaha. Sambaona sokeon niate niaha aro mikkasim dana dana nikataha. Uandake nikatani gimin ja'pangona re'angsrange nigitoe niksokpil'jachim. Ia Kilbolma Kiljanera a'song Te'matchio chiga Ponggroo Udit wariko gongdape Asro Wa'kanta Balikra ba A'kimbrio boksoriri balengachim. Ua Kilbolma an'tangde indinari chajachim, Kilrere Kilteteni bitchriko Kilbolma Kiljaneni bigronko, Bikot-Me'a-Bikot-Pantesa a'ning mitap chining srangchiniko ra'bae ge'a dapa ine agananiba gnang.

Ia Kilbolmani dal'ahaon salgisakna nangtingnakpile ja'pang re'wilwilsokgija rike do'bilbatsokgija dal'e bite nangaha goaha. Kilbolma bite goe Te'matchi warichi peksa aro peksara salgichipak gongaha. Salgichipak gonggipani kil bite goara boksoriri dake Udit warini chio teng'suchakeaha. Ua kil biteni goa chio teng'suchakgipakosa Achak Matgrik-Bijareara sing'engachim. Gonga Raksanpa kil goako aro bite nanga'ko ra'e cha'e nioa, bokbokako kal'kalako tappingako minchotako kilteteko kiljaneko man'jok. Man'enba Gonga inaha, Oh! ian nambatgine, man'ode gamchatbatgine. Anga Na'ma gro dingakon watgine, Na'sa bobil toakon dongine, ia kilrere kiltetekon pe'gine wang'gine ine, chanchiaha aro miksongaha. Iani bitchilde ja'pango ga'akna nanga ine am'e nioa, Mat Mikku Mese Walni tinmisi chikmisiani ga'akako man'e ra'baaha. Ra'bae man'bae an'tangni na'no

nokpang namchik ja'pangna, haida u'inaba donga ine mesokeaha. Mesokeako namchiktang nikenba inaha, 'aio, iade kilding rikna ba'ra dokna, dakmandana re'balbokna choligen, den'pebo na'a mama ada, ine ge'etaha. Ia chasongo Muga-Ildangpara Ki'me Illingpara kering bolko, bolchu bolko kilding rikara a'ba-chajachim. Kilding rike rike nioba kildingan naja man'jani gimin donboke dongaiahachim. Kilbolmako supena nogipa namchiktangni ge'etako man'on, Gongga, ia kilrere kiljanede be'en maronchina mande agittalna gamchatbeani ong'naba donga ine chanchiaha.

### **Gonga Gongsa Kilbolma Supea.**

Nogipa namchiktangni ge'etaniko man'e, Gongga kilbolmako supeenba Baminna Sojona Kaminna on'na re'angaha, jedakode uamang srikokko wilwile tukkuriko bawile kilbisringko sringna kilding sring dingokna mangen. Bitchri gipangchina bigron jelangchina anga wang'na pe'na nangen ine miksongaha. Uandake miksonge, Gongga Mul sni su'songe rimbangsni su'jole cha'cheke anggal so'e, tiluko rimbang roke silmangko atte wakae rua de'bae, bitsi sni karia kari sni, Mitde bonga kilte bonga pe'e wang'e nioba be'atna wilatnan man'jaha.

Unomiting chasongo atte gitichi man'kuja, silmang silchi dongkujachim. Gol'ritchok gil'mongrangchi aro rong'darengrangchisa doktinge subit sugale cho'bil subila aro nokrika nokdakachim. Uandake Gongani jakkalgipa atte rua'an silmang ong'ani gimin matjachim. Una Gongga pil'e silsokchi wal'chaate charurae tonga tapaha. Samsachiko tapoa samsachi nambolchusoai, samsachiko tapoa samachi nambolchusoaiachim. Je gita jotton ka'e nioba Gongga, ua kiltete kilbolmako, jean ja'pang re'wilsokgija rike do.bilbatsokgija dal'a, so'gitchake bila bilsni kari kari snina so'wilwile tapwilwile nioba be'atnan wilatnan man'jaha.

Iandakmiting chachao Misi-Saljong ba Misi-Sal-mora-Saljong-Nimorataba kotip rasong kae jaksil manggol ganne, a'ako wene chiko pan'e re'baeming, Gongga Raksanpani Kilbolma supeao nadike sing'eaha. Maiakosa iandake wang'enga supeenga, Gongga ? Gongga aganchakaha, Kilbolma Kiljaneko pe'ea wang'engai. Misi-Saljong injok, aiao ! na'ara bimang dal'aia kambe chuaia, atte silmang arichi pe'aiode wang'aiode nang'ni janggi tanga dipetna sia chasongsnina wang'oba be'atna wilatna man'jawa. Unara Gongga sing'skajok, iandakode angara maichi wang'e pe'osa be'at wilatna man'gen ? Misi-Saljong Gongana ku'ski ku'pat-tiaha, "A'ning mitap chining srangchi a'song Sime-rang chiga wa'genangchi re'ange silchi dikritpa dare dikjongpa'ona re'angbo. A'song Salaramo chi-ga Mitdesako Sippin ma'an a'songo Balmin ma'an chidingo rua wakaengjok atte debaengjok, silchi bambanengkoba ba'jok, dare am'pang jaksrang dak-jok. Na'a unona re'ange ma'nok cha'e mipal enge unonikoba kajanie bi'ritinge silchiko dareko ra'bae, atte wakae rua debae den'pebo, unosa be'gen. Gongga, Misini ku'pattia gitan Spin ma'an a'songna Balmin ma'an chidingna dakgipana rugipana silchi nikgipa-na dare giteltangna re'angenba silchiko ra'bajok. Ra'baenba Gongga an'tang atte doke nioa changjaha.

Gongani atte wakaani somoi tiktako Me'gam Amillong, Dikgil Asiljong ba Amiltongba, Gongako grongna ine re'baeming Gongani atte dokna chang-gijako nikeaha. Me'gamba nikenba inaha, Gongga na'ade cha'cheko anggal so'e, tiluko rimbang roke dakaiode wal'chaatna jrongatna man'jawa. Uni gi-min skango nang'ni ma'gipani ra'bagipa Mul do'kat-chiko Rimbang Siljanggiko am'e ra'ebo uchisa atte wakana rua debana man'gen ine aganaba. Pile Gongga Me'gamni aganna gita, Do'bakchil adasa Nanai mamasachi re'ange skango ma'gipani ra'bagipa Mul do'katchiko Rimbang Siljanggiko uamang chi-kritinge balritinge man'bara ine knaani gimin uamangoniko bi'e ra'bataaha.

Pil'e Gongga, Misini agananga gita a'song Nong-rengreng-chiga Nongchibingchi rong'sil Moronteko chibrasni wa'ge chong'sni chiginap rong'jamdapni silmang so'ram, silchi chekram a'songni mandeko Kamal Badak-Me'apa-Jodak-Panteko rimbaaha. Rimbaani gimin re'bae, 'Ildek Chikama' biapo Abet Na'gil karam, Na'na cholasiram Dokimbe ontimramo Malcheng wari rikamo rimbang roke a'tip songe rong'ru rong'gate, 'Badak Me'apa Jodak Pante' Gongana silmang silchi sikchengataha, atte gitichi dokchake rua ruchake on'aha.

Unoni intalsa, ua a'songko da'alona kingking Badak-Me'apa-Jodak-Panteni Gongana atte dokchakani rua wakachakani giminsa, 'BADA KKA' ine bimingko mingkamaha. Badak-Me'apa-Jodak-Pante Gongana atte dokani rua wakaani ja'mano noktang songtangchina re'angpilaha, ine mitam me'aparangni agananibagnang. Badak-Me'apa-Jodak-Pantekon Me'gam-Amil-long-Dikgil Asiljong ineba minga.

Badakka a'songo, skang ro'ongni chasongo songdong a'chachenggipa Mitde manderangara, Badakka, Nodinpa, Atia, Gonggera, Chikasin aro Mitde wak, iamang ong'achim. Ia Mitde manderangni songdong a'chaani giminsa, Ildek chiko rorirang 'Deo-Silla' ba 'Chi-Mitde' ine mingengkua. Badak-Me'apa-Jodak-Panteni a'song Badakkako skangni chasongoba Mitde manderang, Koasi Mindira, Rong'gitchak, Do'saram, Sokchuan Meruan aro Mangkima a'briango duule songdongachim. Badakka a'songko jokpakenggipa Ildek chibimako, Mitderangni songdongram a'song chiga ong'ani gimin, rorirang da'onaba Ganges chibima baksa apsan rongtalgipa chi ine aganronga aro maniaba manironga.

Balwa a'dingoni ong'kate jokenggipa Do'panggal Chiringrangni chisamrango silkirangko da'onaba nikna

man'enga. Sil ia biapo bang'en donga. Badakka a'dokko, mongsongbate Gaskar a'bingo Athiawario 0.5 million ton silgrakni silko man'a amma ine Puron M. Sangma, Mineral Resources-ni Officer saksaba saki on'e 1983 bilsio agana. Uandake ia biaprango silko man'a amani giminsa Badak-me'pa-Jodak Pante silkamal ong'e atte wakana Rua Ruchake on'a altua-be'e man'aha.

Silko man'chenggipa mandeni gimin A'chik me-aparangni aganania iandakeba gnang. Gongrang adasa Patrang mamasa daremako satchenga silchimako gochengaha. Daremako Nojingjo, Silchimako Noringro mingachim. Dareko mikkang nikon, silchiko de an'sengon, darean me'gimuaienga, silchian akkaruaiengachim. Uko daksre rusrechenggipa mandeara Megam-Gaeripa-Dikgil-Singeripa, Prap adil sikram, Matcha Duru weram a'song (Memilam A'kingni) ong'a. Mitam me-aparang iandake aganskara, 'A'ning-Koma-Raja, Chining-Kompa-Rajasa, silko dakcheng ruchengaha

Gonga Raksanpa, Badak-me'apani re'angman'o Kilbolmako den'pena supena a'bachengtaiaha. Gonga Kilbolma Kiljaneko kilrere kilteteko bilsni kari snina pe'e wang'e nitaioa be'na jikjekbaaha. Jikjekbaahaon, Kilbolma bachi bachi be'gnok, bachi bachi wilgnok ine jajaaha. Kilbolmani jajaako nike, Misi-Susimeara ku'pakjok, Saljong-Biareara patijok. Salaramchi be'ode Mitdesakchi wilode kil bitchri rakkigipa dongjawa uchide be'nabe wilnabe. Muga-Ildangpachi Kena Illingpachi be'nama wilnama inoba, Muga-Ildangpachi be'ode, Kena-Ildangpachi wilode kari kokting dakjawaha, na'kam wa'sing sinjawaha, Mina a'alijawaha, Na'na cholasijawaha, uchiba be'nabe inaha. Gitchuma Badrichi songginma songchi be'nama wilnama inoba, Gitchuma Badrichi be'ode songa songginchi wilode, kari nogol kitjajokwa, manggra ripok wiljajokwa uchiba be'na wilnabe



injok. Bamunja Sojonjachi be'nama wilnama intaioba unoba inghing, Bamunja Sojonjachi be'o wilode dakmadaan tikjawa re'balbokan gin'jawa ine beng-taiaha. Me'gamchi Dikgilchi be'nama wilnama ine, sing'taiaha. Unoba Misi-Saljong agantaijok, ong'ja uchi be'o wilode te'rik riking sitjawaha, atte silmang botjawaha, uchiba be'nabe inaiaha. Gongga Kilbolmako ja'pang tinwilchinara Kinmako besa kajok, rike sikwilchinara balwako gimal kajok. Uandake ben-chotao, Kilbolma be'na chokchekan man'chakbajae-mingara, Misi-Saljongoba ku'tipgijan sing'aha, ku'wat-gijan bi'aha. Misi-Saljong Kilbolmani sing'ako bi'ako chakchikna amjae ku'pattiaha, "Kiljaneara, be'na wilna nangode, mikkang Amak, kni do'rik Am'bengma-Gisilmachi, Kotchijachi be'angbo wilangbo, uchin kambe gongangbo, uchin cheksi salangbo". Misi-Saljongni ku'pattiani gitan Kilbolma kiljaneara Am'bengma-Gisilmachi, Kotchu a'song jolchi be'ang wilangjok. Uni a'selsa da'alona kingking A'chik a'songni Am'beng aro Kotchu jolchi kil nambata silbata ine me'aparang agana. Kilbolma Am'bengma Gisilmachi be'ang wilangani somoio cheksi be'nasio siksekrikani gimin Daranggre a'songo peksa ga'akrikaha. Uni giminsa Darang Dual a'song joloba alamala kil atchipa'enga ineba agana.

Kilbolma kilteteni kilbone kiljaneni be'anga wilangako Gongga rikangjok. Rikangon Gongga, Am'bengma Gisilmachi rang'san sokangna man'jaha. Uchi Am'bengma Gisilmara balwa rakani stil onani do'japaka mangchikekasa ine kilbolmako den'e sreksni dando sni mrong su'e tingka date donsoman'pilaha; unosa Gongga sokangaha. Gongga rikange nikenba inaha, aiao, angni Kilbone Kiljanekoa mainasa iandake mrong su'e tingka date donjok? Am'bengma Gisilma aganchakaha, angade do'japaka mangchikeka inesa mrong su'e tingka date so'na danengjokai. Unon Gongga duk ong'e inaha, de na'aba gipinara gitchara ong'ja, na'aba Ama, iaba ang' de, ine Gongga agane

ma'nok cha'bataijok. Uno ma'nok cha'enba, nogipako gana re'king ganbone, matchu jengo gatbone, ine nogipa Am'bengma Gisilmako agane donbaaijok. Iandakmiting somoio, Gongga, kilbone kilteteko an'tangni Achak Matgrik Bijareni ki'meo kabite Dimbil Bri Pal'wang A'dingna atma gitcamna anti gitcamna, re'angchina watatjok. Matgrik Bijare watatani gimin re'angon, Gurejako Gandijako, Muga Ildangpako Ki'me Illingpako chikaha. Uandake chikana, aiao, iara sani Achak Bijare ine nioara Gongani Achak Matgrikkosa nikaha. Ua Achakonikon kilrere kilteteko Gongga man'aha ine Muga-Ildangpa u'ina man'aha. U'ienba wal'manchi wal'du kae Illingpa Muga. Ildangpa atma-ona manchiate seginona aganate ra'enba, kilding rike ba'ra dake ja'te ching'e kotip sepat dake Bamunja Sojonjara jakkalpa'enga ine agana.

Kilbolmako den'peani supeani gimin namedake chanchiate niode, Kilbolma supeani be'a ong'ja ine nikna man'gen, Kilbolma a'gipi ong'esa Kinma tinwil-wilani ja'chote, balwa sikwilwilesa pangpiké be'a gita nika. Kilbolmako den'peani ja'mano, Gongga an'tangni jikko deko gale a'ako wene chiko pan'e re'na chanchitaiaha. Unon Gongga Goerani an'tangko so'otnakako imboknakako ma'sienba, an'tangni rua jako ra'ko galwate kataha. Galwate katon, Gongani atte ruara Matia Panchiao onchoke a'ako mateaha, je biapko da'onaba, 'Matia Panchia' ine mingengengkua. Ia rua ga'akchakegipa biapo wari daka chikongba dongengkua.

Rong'sil Moronteko silchi so'on, silchi chekon, a'song chiginap chiga rong jamdap, chibrasni wa'ge chong'sniosa so'chenga chekchenga, ine agananiba gnang. Silchiko so'on, a'ani prem chini jim'jem gimikko minge tate so'ode silan jrongjachim. Indiba, Misi-A'gilpa-Saljong-Galapako minge so'osa silchi jrongaha.

Iandakni ja'mano, Misi-Saljong Gongana aganjok, angni kam chu'sokaba. 'Sillang silchi siknakjok, a'an


rai kanakjok, a'achi napnakgipa napbojok, chio bam-  
nakgipara bambojok, sakchi bilnakgipara bilbojok. Ia  
katarangko Misi-Saljong, Gongana chini bisil ka-  
nakao, a'an mangsil siknakao ku'sikkie ku'pattie  
on'aha. Misi-Saljongni iandake aganani gimin, Gongana  
an'tangde ma'an a'songtangchi katangpilaha. Jo'ong  
cha'gipa namchiktang Miksim-Banggakode Kilrere  
Kilteteko ra'angamitingon noti kam ka'bone, ja'ping  
palatbone, sokme dokan atbone, ine Muga-Ildingpachi  
Kena-Illingpachin galbajok. Nokgipa Goldingde  
A'chik a'songon brangrikjok, songdong a'charikjok.  
Gongani a'songtangchina re'angpilani ja'mano, Misi-  
Saljongni ku'pattiana, pilak a'ani prem chini jim'jem  
gimikkan napbildang katbildange nioa, Kalkambema  
a'ningchi nape katpaachim, indiba napsrapjaeming  
tong'sa napon a'an rai kachangjok. Iandake Kalkame  
Mitedeni nape katgipa biaprangko aro Kalkame  
Mitdekoba tong'sa nape katako Mangsang a'jao aro  
Baringgre a'jao nikna man'engkua.

A'chik me'aparangni skang chasongni sal somoi-  
rango ong'anga pilak obostarangni gimin aganriting-  
bagimin kattarangni gimin namedake chanchiate niat-  
genchim ong'ode, uarang pilakan ong'na kraa ine  
chanchiatna man'gen. A'chik me'aparang an'tangtang-  
ni aganku'ritinganiko a'gilsako donggrikenggipa chin-  
rangko mesoke sakkiko on'a. Gongana Raksanpani donga  
biaprang aro chinrangkoba nikengkua. Gongana Rak-  
sanpani Na'ma Na'sa knobchanggrikgipa biaprangba  
A'chik A'songni pilak biaprangchin gnan. Rangsana  
Arengdo song sambao rong'pattal damsao Gongani  
ja'kol aro uni Achak Matgrik-Bijareni ja'kol koba  
nikengkua. Gongani ja'kolko Ildek chijolni rong'-  
pattalrangoba nikna man'a. Gongani Achak Matgrikko  
Gongana baksa ja'rikako salsao matcha chikna maluaha.  
Ua matchani ja'kol koba Ildek chisamo da'onaba  
ro'ongni kosako nikna man'engkua. Ia pilak chin-  
rangko sawa jena man'gen? Mande ja'kolara mande  
ja'kol srak, Achak ja'kolba aro matcha ja'kolba apsan

dake skangni ro'ongrangni kosakrango chinrang dong-engkua. Ia chinrangara, a'a ba ro'ong pilgimin sam bol matburing (Fossil)-rang ong'a. Iandakgipa a'a ba ro'ong pilgimin sam bol ba matburingrang (Fossil) A'chik a'songo namen bang'a, jerangkon namedake sandina aro chu'onga sakkirangko am'na nangengkua.

Gonga Raksanpa a'songtang chigatangchi sokang-pil'jaha, ine mitam A'chik me'aparangni aganani-rangba gnang. Gonga Raksanpa Kasi Kagra a'songo sica bon'ea ine agana. Gonga Raksanpa maming sae ding'e sia ong'ja, indiba Goerasa Gongako ja'kurik ja'ku sane bobil dinge, Kasi Kagra a'songo Kagra Malasa'o srape rim'enba kakrange uko so'otaha aro bibikko ra'baha. Gongani bibikko ra'baenba, Koasi a'bri kosako ro'ongko dotdok songe do'oko do'bik nie, a'gilsak chigilboona bisi bijong tikangchina sualataha. Goera, Koasi a'brio Gongani bibikchi krite a'gilsak chigilboona bisi bijongko sualman'ani ja'mano, an'tangde mikkasim ranggirimo, guuri rangsnio Misi sakrang kambechi gakat gamoangjok. Goerani Gongako so'ote, Koasi a'brio ro'ong dotdok songne do'oko do'bik niani giminsa, 'Koasi' ine mingaha. Koasi a'brio kosi donggipa, Mitdeni 'Kosi' ong'a, mandeni kosi ong'ja. Koasi Rong'gitchak ba Nokmongni kosako rong'pattalni kosako ro'ong kosi dotdok songa donga, jeoni dotsani ku'chotde 1897 bilsini banggria dal'gipao tong'sa be'sotaha, ine A'chik me'aparang ia ro'ongni be'sotako sakki on'a. Koasi a'brio da'onaba A'chik songsarekrang bilsio changsa maniengkua. Mongsongbate A'song rakode ia Koasini Kosi biapon Salgrue manirongenga aro rorirangba bilsio changsa Paroa do'orangko ra'ange mitde kriteronga. Kasi Kagra a'songkoba Goeran Gongako kakrange so'otchakani giminsa, 'Kasi Kagra minga, ine A'chikrangni agananirang gnang'

Gonga Gongsa Mande mitde ong'e a'gilsak chigilbooko wene kon'e roangaha. Uamangni kam aro kattarangni gimin chong'mot ong'a ba ong'ja, chu'onga sakkirangko man'gijanio da'o ia an'chingni chasong gitalo bebe ra'na man'breja. Indiba, changsao A'chik a'songo maiba kam aro a'selrangde ong'-angaha aro skangni chasongo A'chik a'songo songdong a'chachengsogipa Atchu ambirangba donga, ine adita sakkirangchi u'ina man'a. Ua dongsogipa mande-rangkosa sawan bano donga, maiko dakachim, maming sakkirang dongjani gimin ma'sina man'ja. A'chik a'songo je ong'a obostarangni gimin A'chik ma'gitcham pa'gitchamrangni aganangipa kattarangni gimin namedake ong'a ba ong'ja, uarangni gimin chu'chonchon sandie nina manode namgen.







**Dr. Julius L. R. Marak-ni**  
**segimin ki.taprang.**

**English Ku.sikchi —1. Garo Customary Laws and Practices(1985)**  
**(A Sociological study)**

**A.chik Ku.sikchi —1. Janggil Kom.chik Nokma sakgni (1983)**  
**(Ka.dingna dakmesokani)**

**2. Aje aro Gilje (1984)**  
**(Dakmesokani)**

**3. Serejing aro Waljan (1988)**  
**(Dakmesokani)**

**4. Niba Jonja aro Aje Gilje Tira (1989).**

**5. Dambo aro Rongjengni Nongchramrang**  
**Baksa Gro Dinggrikani Itihas 1991**

**6. Gonga Raksanpa Gongsu Terapa**  
**(1991).**

**Bakrime segipa — 1. Agan Me,apa (1989)**

**2. Ku.jkse (1991)**